



Las treis buobas Melina Bundi (10), Livia Venzin (11) e Sarina Venzin (13) ei separticipadas a differents workshops.



Lavar aur a Fontanivas ei adina in'attracziun speciala.

213 affons – 66 purschidas – 783 frequenzas

Pass da vacanzas dalla Pro Juventute Cadi

■ (cp) Il pass da vacanzas dalla Pro Juventute Cadi ei ius alla fin la sonda vargada, ils 4 d'uoost 2018, cun ina disco per affons. Duront 16 dis han ils 213 affons ch'ei separticipai al pass da vacanzas saviu guder in vast program. En tut ei quei stau 66 purschidas cun 783 frequenzas.

Ils affons han saviu eleger d'ina entochen diesch purschidas. Enzacons workshops ein vegni occupai cumpleinamain e buca tut ils affons han saviu separticipar cun quei ch'els plazs eran limitai. Sur tut ora ha ei denton dau per mintgin differents purschidas fetg interessantas. Els affons han mintgamai grond interess da saver far caussas ch'ei han schiglioc buca la pussevildad da far. Tut quellas purschidas fussen buca pussevivas senza igl engaschi voluntari da gidonters sco era da fatschentas che porschan ils workshops e dils numerus sponsurs.



Leonie Lutz (7) ei separticipada l'empregada al pass da vacanzas.



Flurin Berther (10) ha schau plascher dad ir a mirar ils capricorns.



Il workshop preferiu da Livio Lozza (12) ei stau da durmir ella biblioteca.



Silvan Venzin (10) ha giu plascher da zambargiar en biblioteca. FOTOS MAD

9. Golf Trophy dils juniors a Breil

■ Dumengia vargada, ils 5 d'uoost, ha giu liug a Breil la novavla ediziun dil turnier da golf specialmein per affons e juniors. Tgei ch'els rodond 40 participants han prestau, ha danovamein fatg grond plascher d'observar. Tier las junioras U14-18 ha Bigna Schucan gudignau avon Giannina Arpagaus ed Anna Thut (tuttas treis Club da golf Breil). Tier ils juniors U14-18 ha Silvan Maissen (Club da golf Sedrun) giu la runda pli ferma. El ha gudignau avon Dario Villa

(Club da golf Goldenberg), Silvan Schüick (Club da golf Breil) e Kai Salo Benkert (Club da golf Domat).

Ella categoria U12 mix ha Matiu Schmed gudignau avon Gino Arpagaus e Pirmin Brügger (tuts treis Club da golf Breil). Tier ils pli giuvs ha Clau-Martin Eberhard (Club da golf Sagogn) duvrau las pli paucas fridas. El gudogna la concurrenza avon Noé Zimmermann e Nicolas Müllhaupt (omisdus Club da golf Breil). Il punct culminont ei secapescha

stau la rangaziun che ha giu liug ell'Ustria Tumpiv. Sco usitau ha era uonn mintga participont astgau prender a casa in bi premi.

Sco davos vala ei aunc d'admetter in grond engraziament a tut ils geniturs e gidonters per lur grondius engaschi duront igl entir gi. Il medem vala per Roland Deplazes e sia equipa dils greenkeepers sco era per André Cathomen e siu team dall'Ustria Tumpiv.

Renato Livers, Sport Beat Breil/Flem



Rodond 40 affons e giuvenils ein separticipai alla concurrenza a Breil.



Matti Defuns en acziun duront in concert. MAD

Vuorz: Concert da Mattiu Defuns e Marco Grischott

■ (anr/hh) Venderdis, ils 17 d'uoost 2018 concerteschan Mattiu Defuns e Marco Grischott ella sala d'events dil hotel Ucliva a Vuorz. Igl arranschament entscheiva allas 20.15 e vegn organisau da Cultura Vuorz/Waltensburg. Mattiu Defuns ei naschius 1998 e carschius si a Trun-Darvella. Gia sco buobet han il cant, la musica ed igl art interessau el. Suenten in onn da scola secundara ha el frequentau la scola da talents a Glion culs roms principals cant e gitarra. Suenten la scola obligatoria ha Mattiu Defuns absolvii in precuors dalla scola d'art el Liechtenstein. Gia cun 15 onns ha el cumponiu ils emp-

rems texts per sias canzuns romontschas e la fin 2015 ha el publicau igl empren disc cumpact cul num «Undas» comunablamein cun Giganto. Sia canzun «Olma» ei vegnida publicada da RTR sco 40avel Top Pop of Rumantsch. Sin radio SRF3 ei la canzun lu era stada il toc dil di. Il davos temps ha el dau plirs concerts egl entir cantun Grischun, mo era en auters cantuns. Il mument lavura el vid in ulteriu album a Cuera. Enginas da sias canzuns ein era d'udir sin Youtube, aschia «Mia Olma», «Stagions/Seasons» ni «Bi sco adina». L'entrada el concert a Vuorz cuosta 20 francs, per giuvenils 15 francs.